

何者為急故陳列二事分明士意失得之象自開闢已來行有二急其餘欲知之亦不可知之亦可天地與聖明所務當推行而大得者壽孝為急壽者乃與天地同優也孝者與天地同力也故壽者長生與天同精孝者下承順其上與地同聲此二事者得天地之意凶害自去深思此意太平之理也長壽之要也諸欲為善求活者少故父母者生之根也君者授榮尊之門也師者智之所出不窮之業也此三者道德之門戶也父母傳天地陰陽祖統也師者傳既知天地之意解凡事之結君者當承天地順陰陽當務得其意以理道為事故此三者性命之門戶也深思此言萬害除矣壽孝者神靈所愛好也不壽孝者百禍所趨也此道自然不用力欲知其効常隨人意善惡所致心意謀事於內響應於外欲知其道正影響之應也心以意吉凶之門戶古者太平之君其理要但用心意善即臣善用意誤得臣亦誤心意天地樞機也不可妄動也使和氣錯亂災害日生矣

太平經鈔戊部卷之五

正一天師清微弟子 洪百堅 製作



道教學術資訊網站



太平經鈔己部卷之六 外六  
 今天下所畏口閉為不敢妄譚今日月星曆親天之列宿神也尚相畏是故日出星輒逃匿不敢見畏其威也夫四境之內有嚴帝王天驚核雖京師大遠畏詔書不敢語也一州界有強長吏一州不敢語也一郡有強長吏一郡不敢語一縣有剛強長吏一縣不敢語一閭亭有亭長剛強乃一亭部為不敢語此亭長吏之小者況其大者乎皆恐見害各取解免而已雖有善心意不敢自達於上使道斷絕一家尚親自共血脉同種類而生乃相畏如此況異世乎自中古以來失道德反多以威武相治威相迫脅有不聽者後會大得其害傷深流子孫下古尤甚小有欲上書言事自達帝王比近探其命者輒殺之不即時害傷更相囑託而傷害之故臣民悉結舌杜口為暗雖見愁寃不得上達故今帝王聰明絕也天變日多是明證効也今民親得生於父母受命於天地以天地為父母見災變善惡是天地之譚語欲有所言也且尚皆畏見

害乃相教勅共背皇天后土欲言共殺寃天地乃使辭語不通天地長懷愷愷而不達今帝王雖神人之源乃據百重之內萬里之外百重之內人欲往通言迫脅比進不得往達也夫不得通天地大怒賊殺凡物乃毀天地

大凶之歲斷無聰明乃為大危之國此罪不可復名故當絕滅矣夫大災異變怪者是天地大譚也中災異變者是天地中譚也小災異變者天地小譚也比人事大事大言小事小言不空見也而欺人也夫見大瑞應天地大喜悅中瑞應中喜悅小瑞應小喜悅夫無災無瑞為平也是故天將興祐帝王皆令自有意從古到今將興祐之輒為出奇文異策可按以理故為者悉大吉將不祐之也悉斷奇文異策使不得見或得之又使愚不知策而用之也將興行也使心曠然開通而受用之此天祐法也不欺人也凡人將興者多好善將衰者多好惡也將吉者易開通將凶者好抵冒人也天者常祐善人道者思歸有德天不肯祐惡人道不肯付愚人天符還精

以丹書書以入腹當見腹中之文大吉百邪去矣五官五王為道初為神祖審能閉之閉門戶外闕內明何不洞觀守之積久天醫自下百病悉除因得老壽愚者捐去賢者以為重寶此可謂長存之道

獨貴自然形神相守此兩者同相抱其有奇思反為咎子夫自然不可壽也嬰兒五精還自保也

天君問天下何故難安哉五行神吏上對曰今帝王乃居百重之內去四境萬萬餘里遠者多寃結善惡不得上達奇方異策斷絕不得到帝王前民臣寃結不得自訟通也為此積久四方殺害賢良因而伏感帝王不得奇策異辭以安天下答在四面八方遠界閉不通也

人居天地之間開闢已來人人各一生不得再生也自有名字為人者適中和凡物之長也尊且貴與天地相似今一死迺終古窮天畢地不得復見自名為人不復起行也故悲之大寃之天地格法天地為萬物父母恐

其中有自寃哭淚仰呼天俯叩地而自悲寃得少年故天為生真道奇方可以自防而得小壽者物生皆有老終而愚人不肯力學真道善方可以永享其年不死遲老者反各自輕忽不求奇方而共笑賤真道反共作邪偽

以亂天道共欺其上爭致死地名為冢修之治以待死預作死約及凶服求死得死有何寃哉年竟算盡此比若日出自有入也古者聖人帝王時時有大自重愛而畏死者旦夕思行求異聞殊方敬事道人力盡財空而已至誠涕出感動皇天乃為出瑞應道術之士悉佐之故多得老壽或得度世今天地乃以人為子帝王乃最天貴子也不惜真道奇方為故深計遠慮知天下之財物會非久其有也古者聖人聰明大達眾賢悉出上集為輔

故寃結天地亦有其理況人倫乎帝王得以垂拱無憂賢者亦得盡忠信上輔其君為理共解天地大憂萬民因而興豈不善哉大集難問天地毀起日月星蝕人烈死萬二千國策符子開神文三光何故得蝕也天地

之大怒天地戰鬪不和其驗見効於日月星辰然亦蝕亦不可蝕答在陰陽氣戰鬪陰陽相斲迭爭勝服夫陰與陽本合相利祐共生和氣而反戰鬪恚過在此不和調如使和調不蝕也上古最善之時常在不蝕中古漸失天地之意陰陽稍不相愛故致戰子以吾言不然也使有德之君按行吾文盡得其意戰鬪且止小得其意小止半得其意半止帝王多行道德日月為之不蝕星曆不亂比之人先有相厚久不相親相親當大喜必能相祐利及先不相與比卒相逢便戰鬪矣

請問旱而盡死民因飢寒烈而死此者太陽皇天之殺也六陽具恨因為害也何謂也六方相極其中大綱俱人久為亂惡之故殺也其害於人何哉無有名字但逢其承負之極大怒發不道人善與惡也遭逢者即大凶也比若人大忿怒乃愈甲善人不避之乃賊害乙乙何過也而逢人怒發如此矣故承負之責最極故使人死惡不復分別也大咎在於此矣

請問萬二千國之策各異意比當於何置之各隨其國俗宜以何為始以斗極東南火氣起願聞其意設何也火者陽也其符令主天心者和者主施開者主通明者主理火者為心王神和者為化育萬事將興從心起心者主正事倚仁而明復有神光萬二千國殊策一通為文書上章元氣且自隨而流行真人自屬興之吉逆之喪天乃樂出書故使吾言古者火行同當太平而不正神道今天師獨使令火行正神道何也令乃火氣最盛上皇氣至火氣盛者必正神道何也夫火者乃天之心也心主神心主神當今天氣不調帝王為之愁苦而人不得知其要子欲知此苦人耳今邪人多居位則亂帝王之治令使正人不得處天地為邪氣失正夫邪氣多則共害正正多則共禁邪此二者天地自然之術

請問洞極上平氣主治故天師乃考瘞疥蟲食人獨此驗之所謂蟲食人其為災最其劇逞亂正也今皇平氣至不宜有此應付有德之君欲知道洞洽未令民間悉移蟲主名大

小為害疥從腹中三蟲之屬皆移主名此蟲無不有名少耳蟲迷於內而竊食人象無功之巨逃於內蠶食人矣深可畏之不畏之則至於大害矣天受人命自有格法天地所私者三十歲比若天地日月相推有餘閏也故為私命過此者應為仙人天命上壽百二十為度地壽百歲為度人壽八十歲為度霸壽以六十歲為度作壽五十歲為度過此已下死生無復數者悉被承負之災責也故誠寬乎此人生各得天算有常法今多不能盡其算者天算積無咎故人有善得增算皆此餘算增之欲知大効比若一里有十戶戶有十畝田其九戶為惡盡死滅獨一戶為善并得九戶田業此之謂也不望陰陽祐人令人或不得其數而望得天報者會不得天報也

今日食人而後日住食之不名為食人名為寄糧今日飲人而後日往飲之不名為飲人名為寄漿今日代人負重後日往寄重鳥不名代人持重乃名寄裝今日授人力後日往報之不名為助人名為交功今人譽舉人後

日見譽舉不名爲舉，舉人也。乃名爲更送，相稱如此。比類者衆，多不可勝記。如此者皆無天報也。然人不祐，吾獨陰祐之。天報此人言我爲惡，我獨爲善。天報此人，人不加功於我，我獨樂加功焉。天報此人，人不食飲我，我獨樂食飲之。天報此人，人盡習教爲虛僞，行以相欺，始我獨教人爲善。至誠信天報此人，人盡言天地無知，我獨陰畏承事之。天報此人，人盡陰欲欺其君上，我獨陰祐利之，不敢欺天報此人。父母不愛我，我獨愛祐之。天報此人，如是比较者衆，多不可勝記。真人自計之上士，求天報中士，求人報下愚，不施反求報上善之人。得天報者，度也。中善之人，得人報，故愛利之。而仕之下愚，無功而強報，故天人共惡而誅之。故上皇皇天之氣，悉下生后土之氣。悉上養五行之氣。悉并力四時之氣。悉和合三光，更明天下同心爲一天性。爲行最尊之重之愛之祐之。天性既善，悉生萬物無不置也。地性善養萬物而無不置也。聖人悉樂理天地而萬物受其功，大善神真仙。

人助天地行，不敢自苦也。悉與元氣同，與天心相得，故獨長吉而無凶也。古者聖人，賢人深思遠慮，乃知天道，意但專陰行善，不敢爲惡也。深觀皇天明禁，下乃替而加之。學問淺劣，復不信天禁，故難移矣。失而早亡矣。願聞天壽百二十歲，地壽百歲，人壽八十歲，霸壽六十歲，侏壽五十歲，三正起於東方，天之首端也。歲月極於東北，天極也。夫天壽者，數之剛也。東北物之始也。一年大數終於此，故百二十爲象天也。地者陰也，常受施西北，爲極陰也。陰者殺而陽生，故亥者殺也。陰終西北角也。西北爲地之司命，故地壽得百歲。八十者，六十者，陽止陰起，方立秋，秋者白氣，白虎持事故，霸命也。五十者，陽氣興長於上，陰氣伏起於下，陰件陽化，故爲侏命。過此而下，悉曰無常命。誠究結哉。今且曉子一解，可以終古自養而極者，不可忘也。人欲去凶而速害，得長壽者，本當保知自愛，自好自親，以此自養，乃可無凶害也。身得長保，飲食以時，調之不多不少，是其自愛自養也。而撞門戶，閉之居

內不與俗事，是自愛自養也。而讀書無極安貧樂賤，無憂而已。是其自愛自養也。已前皆如是而非也。夫自愛爲言者，誠誠自愛，保自念身無足冥目，亦還自視無足，未常須更離之。因思而憂之，乃至不食而飽，是爲自愛之人也。自好爲言者，乃好念身形，容上下累累可觀，誠好愛不止，面目生光明也。晝夜不能忘，以爲經常，因得肉飛而可強，是爲自好愛之道也。今故使男女大小老少賢不肖，共集上書爲帝王通達聰明帝王，比若中極星。默常居其處，而衆星共往奏事也。大者居前，中者居中，小者居後，一星不得，輒有絕氣。天行爲傷，夫星者，乃人民凡物之精光，故一人不得通於帝王，一星亦不得通也。故天氣輒爲乖錯，地氣爲其逆也。故教其吏民大小俱共上書，以通天氣，以安星曆，以除天病，以解帝王承負之責。故示勅使三通行書者，恐有不通，故各自其使，宜長吏者記城郭之災變，布道者記市道之災變，四野者記四野之災變，各相取長短，傳以相語，共爭上之長吏，亦



務上書邑民亦務上書行人亦務上書長吏欲不上恐民上之民人不上恐行人上之行人不上恐長吏上之故使民俱坐乃後且爭上事也吏民有信者帝王任之不負焉故吏民樂為也帝王得以為聰明而稱王心而長安其身吏民得以尊天地得以無病天地四方俱有利故長古為萬萬世法也以付上德之君使民知天意今以自安自全無為迷惑大集具正事考本天地之根以除天恐地咎國之害立洞極經

又請問天師之書乃拘校天地開闢已來前後賢聖文河洛圖書神文下及凡民之辭語下及奴婢遠及夷狄皆受奇辭殊策合為一語以明天道曾不大煩乎哉為其遠煩而不通故各就求善太平之宅於其所屬邑鄉主備其速不能自致故為其立宅道上使投異辭善策奇方於其中因取事持往獻有德之君今群賢共定按之以類相求取上第一善者去其邪辭以為洞極之經名為天洞極政事乃今天地之病且悉除去也帝王之理且

一大安也承負萬世之災厄會且却去也然後萬物群神且化萬一可言而不復上白人惡於天上也故勅使拘校之者乃天使吾下言也雖煩安得不力為之乎天下文書及人各言一歲言十數而天下疑事悉自解亦無大煩也但各居其處而言之傳持獻上是為天下集言而共語以通達天地之意以通天地之氣以除帝王災害以利凡民及萬物莫不各得處其所者乃後天地一旦大悅喜病一除喜則祐帝王也今無事長遊也

願聞天地何故一時使天下人共集辭策及古今神聖之文以為洞極經乎然天地有劇病常疾亂未常得善理也故教示人集議而共集出正語奇策以除病也故使其大共集言事也

願聞天地亂而有病何不更生善聖人乎力復生後聖人乃無益何也天師言行古聖人有優劣各長於一事俱為天譴地語而作殊異是故眾聖前後出者所為各異也俱樂得天心地意去惡致善而辭不盡同大類相似

故眾聖不能悉知天地意故天地常有劇病而悉不除故遣吾語以告真人所告真人者天上諸神言天下有樂善欲稱天心獨有真久耳行所以拘校上古神文中古神文下古神文者或上古神文未及言之中古神文言之中古神文未及言之下古神文言之因以類相從相補共成一善辭故使集之然後天地意可觀矣行上古聖人失之中古聖人得之中古聖人失之下古聖人得之下古聖人失之上古聖人得之以類相從因以相補共成一善聖辭矣上聖或有短失之中聖得之中聖失之中聖得之因復以類相從因而相補共成一善聖辭矣大賢以短失之中賢得之中賢失之中賢得之以類相從共成一善賢辭矣帝王失之臣子得之臣子失之庶子得之以類相從因以相補共成一善辭矣上老失之丁壯得之丁壯失之少者得之以類相補共成一善辭矣男子失之女子得之女子失之奴婢夷狄得之以類相從因以相補共成一善辭矣上古文失之中古文得之中

古文失之下古文得之以類相從因以相補  
共成一善辭矣行或上古人失之中古人得  
之中古人失之下古人得之以類相從以類  
相補共成一善辭矣行或上失之而下得之  
或下失之而上得之或上下失之中得之或  
中失之上下得之或天神失之反聖人得  
之或聖人失之反賢人得之賢者又失之而  
庶民反得之庶民又失之反夷狄得之或內  
失之反外得之外失之反內得之會有得之  
者會有失之者故上下外內尊卑遠近俱取  
其文要語而集其長短以類相從因以相補  
則且矣然後文書辭言通具也天地生出凡  
事人民聖賢鼓行萬物之屬各有短長各有  
不及各有所失故所為各異大率俱欲得天  
地之心而自安也故今天遣吾下為上德君  
更考文教吾都集合之神文聖賢辭下及庶  
人奴婢夷狄以類相從合其辭語善者以為  
洞經名為皇天洞極政事之文也然後天地  
病一悉除去也

正其言則凶然後太平上皇之氣立矣夫  
人有病皆願速較為善天地之病亦願速較  
為善矣天邪大亂道經書道經亂則又天地  
理亂矣天文地理亂則天地病矣故使三光  
風雨四時五行戰鬪無常歲為其凶帝王為  
愁苦懸官亂理民愁苦飢寒此為邪文所病  
矣夫邪文邪言誤辭以理國也日日得亂於  
是臣為枉法而妄為民為之困窮共汙天地  
之理亂天官大怒哭泣呼冤不絕矣邪言邪  
文誤辭以理家也則父子夫婦亂更相憎惡  
而常鬪辭不絕遂為凶家矣夫正言正文正  
辭乃是正天地之根而妻家國寶器父母也  
而天下凡人萬物所受命也故當力正之也  
故吾之為道悉守本戒中而棄末天守本故  
吾守本也天戒中故吾戒中也天棄末故吾  
棄末也吾之為文也乃與天地同身同心同  
意同方同理同好同惡同道同路故令德君  
按用之無一誤也萬萬歲不可去但有日彰  
明無有冥冥時但有日理無有亂時但有日  
善無有惡時也故號天之洞極正道乃與天

地心相抱故得其上訣者可老壽得中訣者  
為國輔得下訣者可常自安  
請問陽何從獨得尊而貴陰獨名卑而賤哉  
神人言陽所以獨名尊而貴者守本常盈滿  
而有實也陰所以獨名卑而且賤者以其虛  
空而無實也故見惡見賤也夫陰陽男女者  
本元氣之所始起陰陽之門戶也人所受命  
生處是其本也故男受命者盈滿而有餘其  
下左右尚有一實上者盈滿而有餘常施下  
陰而積聚有餘上施者太陽行也無不生無  
不能成下有積聚者太陰應地而有文理應  
阡陌左實者應人右實者應萬物實核實也  
則仁好施故陽得稱尊而貴也女所以卑賤  
其受命處空而虛無盈餘又無實故卑也故  
天道重本守始故當反本守元正守考文以  
解迷惑也故能使天長地久安國寧民而陽  
實好施故也陽天也君也陰地也臣也故敬  
陽之施因而養之  
請問神人天下凡有幾國然中部八十一域  
次其外復一周天下有萬國遠出列洞虛無

表并合三部為萬二千國皆稟受太平之教  
 今太平一歲人為喜樂順善二歲地上為大  
 樂三歲恩澤究洽於天下四歲風氣順行五  
 歲行神不戰妖惡伏滅六歲而究著六紀七  
 歲乃三光更明八歲而恩究達八方九歲陰  
 陽俱悅十歲萬物悉各其所為數小終物因  
 而三合之乃天地人備故三十歲而太平今  
 上皇氣出真道至以理十年小太平也如力  
 行真道二十歲而中太平者乃謂帝王已下  
 乃臣民大小按行真道共却邪偽也

○神人語真人言古始學道之時神遊守素以  
 自全積德不止道致仙乘雲駕龍行天門隨  
 天轉易若循環真人專一老壽命與天連陽  
 道積專日有單至信所致無爭榮名而居高  
 官孝順事師道自來為神乃知善人與語言  
 夫師開矇為道之端君父及師天下命門能  
 敬事此三人道乃大陳不事此三人室閉無  
 門福德皆逃禍亂為憐詳惟其事無失書言  
 父母生之師教其交居親仕之可不慎焉天  
 下至士去官就仙無窮時命與天連長吏

治民仙吏天官與俗何事其事莫為長吏治  
 民仙萬神天下之事各自有君努力思善身  
 可完全以是遂去不負祖先吾國書已盡無  
 復可陳致勉學詳請其文神人將去故戒  
 真人慎之慎之亦無妄傳不得其人慎無出  
 焉歲之深淵幽冥之間道不飲血無語要文  
 外內已悉無可復言

於此畫神人羽服乘九龍筆升天鸞鶴小  
 真陪從彩雲擁前如告別其人志



西壁圖上古神人真人戒後學者為惡圖象  
 無為陰賊不好順事反好為嫉妬令人死凶  
 天道不可強劫劫之必致兵喪威之死滅世  
 亡盜神書必敗欲以為利反以為害此即響  
 應天地之性也乃致自然之際會審樂以長  
 存慎之慎之無好為害善者自然惡者自敗  
 觀此二象思其利害凡天下之事各從其類  
 毛髮之間無有過差但人不自精自以不知  
 罪名一著不可奈何不守其本身死有餘過  
 乃為惡於內精氣相名於外故前有善獄後  
 有惡鬼皆來趣聞欲悔之不得因以忘身故  
 畫像以示後來賢明得之以為大戒愚者不  
 信道自若忽事書而言不失銖分故守素者  
 長壽好聞者令人不存物事各從其類不復  
 得還悔之無益鬼以著焉見戒覺以時自還  
 今上未傷固可得為善人善者乃上行惡者  
 乃下降天道無私乃有自然不失開達無閉  
 絕以稱天心地意轉天地之災變暢天地之  
 譚使人民各居其處萬物不傷故天出文書  
 今使可遠行萬萬里得通其言以暢善人以



知惡人以解冤結故帝王乃居百重之內得長自安聰明達遠方也由太上中古已來多背叛天地共欺其上故災害日興死者不以數也帝王久愁不能拘制其下為奸偽故天遣三道文出也通其氣樂知得失上下和合諫及四遠卑賤令無冤結以稱皇天心樂災除去勿令天怒下古人心邪蔽不若太上古之三皇人心質朴心意專一各樂稱天心而忠信不欺其上故可無文也下古小人愚蔽矯妄文辭欺天地罔冒帝王故天地常忿怒而災禍之天地病除帝王安且壽民安其所萬物得天年無有怨恨陰陽順行群神大樂且喜悅故為要道也夫子不孝不能盡力養其親弟子不順則不能盡力順明師之道臣不忠則不能盡力共敬事其君為此三行而不善罪名不可除也天憎之鬼神害之人共惡之死尚有餘責於地下名三行不順善之子也常以月盡明且見對於天主正理陰陽尊卑之神史魂魄為之愁苦至減乃已天以十五日為一小界故月至十五日而折小還

以一月為中部以一年為大部天地之間諸神精當共助天生長養萬二千物故諸神精悉皆得祿食也此若群臣賢者共助帝王長養凡民萬物皆得祿食也故天為法常諸神以月十五日而小上對一月而中上對一歲而大對故有大功者賜選舉之其無功者退去之或擊治此亂治者專邪惡之神也人生為子孝為臣忠為弟子順不離其身然後死魂魄神精不見對也其二部界者讀吾道書文合於古今於類相從都得其要意上賢明翁然喜之不能禁止為善也乃至於敢入茅室堅守之不失必得度世而去志與神靈大合洞不得復舉於俗事也其善乃洞究洽於天地其神乃助天地復還助帝王化惡恩及草木小微莫不被蒙其德化者是故古者賢明得師能助帝王致太平者皆得此人也中賢力共讀吾道書合於古今道文書以類相從力讀而止其賢才者乃可上為帝王良輔善吏助德君化惡恩下及小微草木陰陽和合無復有戰鬥者帝王長優游而無事群臣

下俱相示教力為之莫不順善而忠信無刑罰而理不善不可勝矣其民共讀吾道文上下通都合計同策為一無復知為凶惡者也拘校古今道文以類相從相因為世學父子相傳無窮已也如三賢中賢下及民俱為之占天地惡氣年去矣無復承負之厄會也善乃合陰陽天氣和地瑞應畢出游於帝王之都是皇天后土洽悅喜之證也故讀吾道者宜精詳之其三部界者夫人得道者必見神能使之其上賢明者治十中十可為帝王使辟邪去惡之臣也或久久乃能入室而度世不復舉於俗事故守一然後具知善惡過失處然後能守道入室精思然後能守神故第三也賢者拘校古今神書以相證明也中賢守一入道之且自覩神治十中九可為王侯大臣共辟去邪惡久久莫及入室矣其小賢守一入道讀書亦或覩神可治十中八可為民共辟邪除惡也亦皆拘校古今道文以自相證明乃愚者悉解信道也大賢中賢下民俱守神道而為之則天地四時之神悉



與邪自消亡此則天下地上四方六屬六親之神悉悅喜天與善助人為吉矣吾道乃為理天地安帝王生天地所愛者乃當愛真道真德也夫天者乃道之真道之綱道之信道之因而行也地者乃德之長德之紀德之所因緣而止也故長為萬物之母也常忍辱居其下也不自言勞苦也吾之為德君教化下愚正以此天地二事為祖故常按天地之法度不失其門戶也吾之書即天譚地語與神祇深獨相應若表裏也天下之名今所屬皆以類相從故知命其所屬故含五姓多者象陽而仁含六情多者象陰而貪又受陽施多者為男受陰施多者為女受王相氣多者尊貴則專受休廢囚氣多者數病而早死又貧極也故凡人生者在其所象五行之氣其命者繫於六甲五層以類古之萬不失一也古者聖人深原凡事知人情者以此也真人知之耶上視天而行象天可為俯視地而行象地德而移念天地使父母生長我不欲樂我為惡也還考之於心乃行心者最藏之神專

者也心者神聖純陽火也行火者動而上行與天同光故日者乃火之王為天下正無不照明故人為至誠心中正疾痛心神聖上白於日月乃上白於天故至誠於內者神靈也可不慎乎天以至道為行地以至德為行至德為家共生萬物無所匿無可私古者聖人象天地為行以至道要德力教化愚人使為謹良令易治今世反多閉絕之故愚人共為狡猾為失天道不自知非各在真道善德不施行故人多天譚當死不除也今天師廣開天道之路悉拘校古者道書之文以為真要秘道真道者多善其文乃入神故能親神與神為治若神入神則真道也乃多成於幽室或有使度於室中而去者或有一入未去者或有但見神而終古不去者行為子道學而得大官者使憲凡人專問也今日入學門用心專一常欲利愛而不妄語年少而學至老窮無復知乃止不樂得官也但身好學務欲知經道積為善而不止行名立經道成深知古今災變所從起其行與學有益於

上有利於下為善積聞不可蓋聞名聞四達明王好之因而徵索詔取萬俱言善哉是其人也傍人為其悅喜足者即其善人學而度世者也行復為子說道其不度者意今日入學門不樂思得真道善說但欲博聞多觀可以行窮極聖人者又不欲推行作善反好浮華之文可以相欺偽者或既得入經道又用心不專一常欲妄語辯於口辭以害人為職不尊重上不利愛下復經道空虛未足以為帝王之良臣反行首長者傍人以財貨自助欲得大官以起名譽因而盜採財利以公趣私背上利下是即亂賊敗正治天地之害國家賊也民之虎狼父母之惡子天地憎之鬼神惡之故其罪當誅之於帝王以稱天心以解民之大害是其抵欺而得官者也或有用心不專實空虛無真守及積常思欲得官官者天之列宿官也以封有德實有功也不以妄與無功之人也無功之人天地所忽神靈所不愛也下愚不能深自知惡反妄思得天官而不止邪鬼物因而共入其心使妄語因

而妖言而不能自禁止也故時有邪言而死  
者此之謂也非獨為道不得其意則凶也真  
人努力自度之術矣古者聖賢親天法明故  
能行道守德也天乃專一晝夜行道而不言  
故能長吉地乃晝夜行道而不言愛養萬物  
故能獨吉也外六四時晝夜行道而不止故能常  
獨興王而不止也三光乃獨行真道而不言  
故能常明隨天運行也五行乃獨行真道而  
不言故能與天地為常也凡天下之為道者  
象此不可勝書也常能愛利口不妄言則道  
可得也欲輕忽反吾言者為道所賊也吾乃  
為天譴以戒上德之君夫德君天之興必且  
好道萬民且象其君而為之皆以此文為戒  
是故天之為象法也乃尊無上反半無下其  
大無外反其小無內包養萬物善惡大小皆  
利祐之受以元氣而生之終之不害傷也故  
能為天最稱神也故名天上之君也今上皇  
氣至德君治當象此為法故吾道一高一下  
一沈一浮欲使眾賢共策之故東南地戶乃  
有天地之水不逆小流之力也善惡大小皆

歸之真人知之耶文書億卷中有能增人年  
壽益人命者真文也其餘非也文書滿室中  
有能得天心平治者真文也其餘非也臣子  
滿朝廷中有能樂其君助其君致太平者是  
帝王之真臣良吏其餘者佐職之臣子也人  
生一子而父母常得其養而不飢寒者是賢  
孝之子其餘皆悉備數也積方重車中有皆  
能益年者是具方也其餘非也天下若此類  
衆多不可稱記預說也真人自深思其意吾  
文以一推萬足以明天下之道矣故使真人  
傳道於上德之君拘校凡人辭聖書者明  
以示眾賢使一俱覺解迷惑也拘校凡人之  
後災日去矣夫邪文邪言乃奸災之主人也  
夫正文正言乃逐邪奸惡之吏也以文正言  
以吏正奸偽無主人則無止宿之所矣夫邪  
言為奸主人比若盜賊有舍止之所也主人  
已死亡盜賊無緣復得求止息也  
行天道之為法以一況萬萬不可盡書也文  
多使人眩惑不若舉一綱使萬目自列而張  
之故萬人擾擾不若一帝王也眾星億億不

若一日之明也柱天群下效行之言不若國  
一賢良也天道廣縱無復窮極不若一元氣  
與天持命綱也賢者上德之君得思吾言壽  
自長也後世共思吾言自父慈子孝日廣且  
明也大小爭為善後無彊也不知復有邪文  
佞人國以藏也災變盡除三光明也自然之  
術天師共純也為道如此何有傷遂以為法  
乃天行也垂書記之是思天地神明也以微  
之文與天地響應也是天合信符也上君賢  
者宜共策此辭行之者日與與時宜為朝得  
天地之欲故吉哉吾為太平德君制作法度  
不限一人夫太平氣來有一人自寬不得其  
欲者則上皇太平氣不得俱來至也故天教  
吾廣開闢其路使自恣自擇可為也賢明欲  
樂活者可學吾文思其意入室成道可得活  
賢柔欲樂輔帝王治象吾文為之可以致太  
平乎欲樂居家治生商財者思吾文可竟天  
乎各得其所願無大自寬也故德君以治大  
平之氣來也所以然者乃天下無自寬者各  
自得其所上德之君賢明者不奪所欲必得

天下之心欲承天意以歸之天之行不奪人所欲地之行不奪人所欲明君象之故致太平天地至神猶不奪所欲況人乎哉  
 上古神人戒弟子後學者為善圖象陰祐利人常言其功增倍陽善者人即相冗答而解陰者乃天地諸神知之故增倍也積德者富人愛好之其善自來也人之所舉鬼神亦然因而祐助之好道者長生乃與陰陽同其憂順皇靈之行天地之性得其道理故天祐之也夫者亂天不好善人也夫求善以善無可怪學以仁得之道之始也以德得之道之中。和也以道得之上也吾本少學而不止精神念之涕常欲下為此積久蒙皇天大恩今日幸得逢天神人於曠野始學若虧恩問小事外浮華也本求守一養性之法凡三百首乃見天師說而無極故敢問身寧可得長存否子為天來學問疑吾為天授子也願聞其訣意以何明之也今有德之君得吾書心解行之與眾賢共議以化凡民必與立誓相應是其明證也吾道以誠成不設偽言行已訣矣

吾合此道久以無可與語者天竟結有劇病變不絕此其悒悒不通天師何自往與付之曰位不當也吾職在天真人職在地在地者出萬物故天生者於地養之故吾傳道於真人地生君王凡民萬二千物悉得陽施從陰中出故子得傳於人也子以吾言不誠信也夫天雖有所出不與人語情意同吾書承天教今明若丹青也天數之始也是故天地未分之時積氣都合為一分為二成夫婦天下施於地懷姙於玄冥字為甲子布根東北丑與寅始見於卯畢東南辰與巳垂枝於南春於午向老西南未與申成與西方日入酉畢歲西北戌與亥故數起於一而止於十者五千之始五行之本也數一以乘十百而備是故天生內故畢終是故斗建於辰破於戌建者立也故萬物欲畢生破者敗也萬物畢死於戌數天地八方十而備陰陽建破故以此往來復其故隨斗所指以明事吾書乃為除害氣故曰象天為法  
 太平經鈔已部卷之六

太平經鈔庚部卷之七  
 虛無自然圖道必成誠  
 外七  
 虛無者乃內實外虛有若無也反其胞胎與道居也獨存其心懸龍慮也遠為神室聚道虛也但與氣游故虛無也在氣與神其餘悉除也以心為主故得無邪也詳論其意無忘真書也得之則度世可久游也何不趣精反與愚俱也凶禍一至被大災也棄其真朴反成土灰也賢者見書識之  
 無為者無不為也乃與道連出嬰兒前入無間到於太初乃返還也天地初起陰陽源也入無為之術身可完也去本來末道之患也離其太初難得完也去生已遠就死門也好為俗學傷魂神也守二忘一失其相也可不戒之道之元也子專守一仁賢源也天道行一故完全也地道行二與鬼為隣也審知無為與其道最神也詳思其事真人先也閉子之金闕無今出門也寂無聲長精神神氣已畢仙道門易哉大道不復煩天道無規歸仁賢也